



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 3

Yangia anidakangma : f Tir Yimiyim

Instagram tiryimiyim@aolima

YouTube tir yimiyim

TAPAK 8

Himanta Sarma-i Gauhati High Court  
nung CJI inyaktsüla: Akhil Gogoi

Sher Bahadur Deuba-i Nepal  
PM mapa agizükogo



VOL. XVIII NO. 270 (ADOK 270) DIMAPUR

RASEMNÜ (WEDNESDAY)

CHITENI (JULY) 14, 2021

₹ 5.00

## Taoba NLA MLA Dr. Nihoshe asü

**Dimapur, July 13, 2021 (TYO):** Nagaland nung taoba MLA aser Parliamentary Secretary Dr. K.C Nihoshe Yeptho alima nungi pilaogo. Pa arishi küm 77 tain liasü.

Mapang talangka temang manemi anepalua arur Mongulbarnü pa Christian Institute of Health Sciences and Research (Referral) hospital nung asü.

Dimapur kübok Chekiye yim nung par kidang asüpila sentep sentong agiba sülen Zunheboto district kübok par tasoyim Sukhalu nung mang aremtsü atema bener ao.

Nagaland Chief Minister Neiphiu Rio-i sangdong ka nung Dr. K. C. Nihoshe asüba osang angashi temolung raksaba aser mangyimba

metetdaktüsüo.

"Dr. Nihoshe-i 2008 küm State politics nung aden aser 35 Assembly Constituency Zunheboto nungi independent candidate ka ama toktep" ta CM Rio-i ashi.

"Dr. Nihoshe ya kanga tenendak aser alizung tulu ayuba lennir ka liasü. Pa asüba ya par kibong den Sümi nung er atema takoksa tulu ka lir. Pa asenok den meliaka, pai mapa tajung inyaka yutsübatem teti bilemtetsü" ta paisa metetdaktüsü.

CM Rio-isa asür kibong den mangyimba lemsatepba den Tsüngremi tashi agütsüsü asoshi sarasademtsüba metetdaktüsüo. (Maneni tapak 2 nung...)

## Assam Cattle Bill ya NE atema lendong lir: NPCC

**Dimapur, July 13, 2021 (TYO):** Assam Cattle Preservation Bill, 2021 ajanga Northeast nung shishilembaba aser chiyungba nung tetsükdaktüsü bentsür marutsüla, ta NPCC-i tanü metetdaktüsü.

"Northeast nung nashi shishilembaba ya Assam adena Bangladesh aser Myanmar tashi nung inyaker. Alemlü nungi Hill State tem atema iba mapa inyaka arur aser Bill ajang iba nung tetsükdaktüsü kecha bentsür marutsüla" ta NPCC President, K Therie-i sangdong ka nung ashi.

Tekümdangtsü kaji iba ozüing tim mesüi amshia nisungtem dak

tai tongloktüsü akok aser iba ajanga telok balala tsüingda meputep adoktsü. India kübok BJP sorkar aliba state temi cow protection bill tem agizüka yangluba ajizüka Assam nunga yanglutsü meranger saka India tongtülen alirtem den liromedema asenoki asen sobaliba memelenshitetsü, ta paisa metetdaktüsü.

"State List nung ajemdaker Assam-i pei sasep nung ozüing yanglutsü temeten lir saka iba Bill agizüka ozüing makümdang asenok Union of States nung aliba bilemtetsüla. Rongsenketzüing tsütsü state tem sendaktepa lir" ta NPCC President-isa ashi.

## Temeshi nashi shi achiba magizüker: MLA Rupjyoti Kurmi

**Guwahati, July 13, 2021 (Agencies):** Assam nung taoba Congress MLA Rupjyoti Kurmi-i Cow protection bill pelashishia agizüker aser temeshi nashi shi achiba magizüker ta metetdaktüsüo.

"Nashii asenok nem mamatzü agütsür aser asenoki nashi külemer. Nashii alu ayimba nunga yarir. Süra, kodaser asenoki nashi tepsettsü aser shi achitsü? Anungji temeshi nashi shi achiba

magizüker" ta Mariani MLA Kurmi-i ashi.

Assam nung nisung 80% shi kati iba bill pelashishia agizüktüsü aser AIUFD dena 20% shi kati magizüktüsü, ta paisa ashi.

Kurmi-isa osangbener dang pai tawa BJP nung adenba indang olen ka jembidang "Himanta Biswa Sarma-i taruba küm 20-25 tashi Chief Minister inyaktüsü aser idangjibo Akhil Gogoi aser Congress nung er tambur kümer alitsü" ta ashi.

## PM Modi-i Sonowal aser Rijju na Cabinet Committee nung aniokogo

**New Delhi, July 13, 2021 (Agencies):** Union Cabinet ulushiba sülen Mongulbarnü Prime Minister Narendra Modi-i Cabinet committee tem tentetshio.

Iba mapang Modi-i Cabinet Committee on Economic Affairs (CCEA) nung Union minister Sarbananda Sonowal shimsemogo.

Maneni, defence minister Rajnath Singh-i aniba Cabinet Committee on Parliamentary Affairs nung Union minister tem-Kiren Rijju, Virendra Kumar aser

Anurag Singh Thakur nungertem aniok.

Tawa Cabinet melenshiba nung Northeast nungi Kiren Rijju Cabinet menden nung ajungket aser law & justice mapa lemküttsü.

PM Modi-i Cabinet Committee on Political Affairs (CCPA) nung nisung tasentem aniok aser Cabinet Committee on Economic Affairs (CCEA) nung züngsem ajemogo.

PM Modi-i tentetba luden ajak nung Rajnath, Shah aser Sitharaman nungertem shimoka lir.

## 2016 nungi Nagaland-i Assam li 99 ben atsünga agi

**Guwahati, July 13, 2021 (Agencies):** 2016 küm nungi kidanger state temi Assam ali 290 shi atsünga agiogo ta chief minister Himanta Biswa Sarma-i ashi.

Leader of Opposition Debabrata Saikia-i assembly nung asüingdangba langzüdang CM Sarma-i ali atsünga agiba tatalokbatem osang metetdaktüsü. Pai Assam home department portfolio bena lir.

Assam den kidanger state temi

ali atsünga agiba nung Nagaland-i 99 ben tashi inyaker aser ibaji teimtiba asütsü, ta Assam home department-i ashi.

Nagaland-i 99 tashi ali atsünga agibaji Karbi Anglong nung 49, Sivasagar nung 36, Jorhat nung 9 aser Charaideo nung 5 atalok.

Iba sülen Mizoram-i 42 tashi ali atsünga agi. Itemji Cachar nung 25, Hailakandi (16) aser Karimganj (1) lir.

Meghalaya-ia ali 40 ben atsünga agi aser itemji West Karbi

Anglong aser Kamrup nung atalok.

Maneni, Arunachal Pradesh-ia 28 tashi ali atsünga agi aser itemji Dhemaji (9), Lakhimpur (8), Biswanath Chariali (7), Charaideo (2), Sadiya (2) aser Tinsukia (1) lir.

Ali atsünga agiba atema nisung asem tashi apu aser parnokji Charaideo nung Nagaland nungi nisung 2 aser Karbi Anglong nung Meghalaya nungi nisung 1 apu, ta Assam home department-isa metetdaktüsü.

## COVID-19 Nagaland: Nisung 88 dak putet, 3 asü

**Kohima, July 13, 2021 (TYO):** Mongulbarnü Nagaland nung nisung 88 dak COVID-19 putet aser nisung 3 asü.

"Tanü nisung 88 dak COVID-19 aliba putet. Parnokji Kohima nung 30, Mokochung nung 28, Dimapur nung 8, Longleng o Mon nung trokrok (6), Phek nung 4, Zunheboto nung 3 aser Kiphire, Tuensang o Wokha nung kaka (1) lir. Parnok züngsema nisung ajak agi 26,140 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Mongulbarnü COVID-19 puteta alir nisung 80 tashi taneptsü angu. Parnokji Kohima nung 35, Mokochung nung 16, Dimapur nung 15 aser Kiphire o Mon nung tenetnet (7) lir. Parnok züngsema taneptsü angur 23,938 kümogo" ta paisa ashi.

Nagaland nung COVID-19

nungi taneptsü angurji 91.57% lir aser tang nisung 962 anepaludar, ta Dr Kikon-isa ashi.

Mongulbarnü COVID-19 puteta alir nisung 3 tashi asü. Dimapur nung nisung ana aser Kohima nung ka asü aser parnok züngsema tasür ajak agi 514 kümogo, saka nisung 14 bo tanga tashidak ajanga asü, ta paisa metetdaktüsü.

"Nagaland nung COVID-19 alitsü akok ta temolung melemba sample 2,40,321 tendangogo. RT-PCR ajanga 99,837, TrueNat ajanga 64,119 aser Rapid Antigen Test ajanga 76,365 tendang" ta Dr Kikon-isa ashi.

"Hombar tashi nung nisung 5,19,938 nem COVID-19 vaccine indang dose 6,17,690 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline

workers 60,356, healthcare workers 15,858, arishi küm 45 ser temapur 1,65,517 aser arishi küm 18 nungi 44 tsüingda alir 2,78,207 lir, ta paisa ashi.

"Vaccine agirtem rongnung nisung 97,752-i dose anaprong agiogo. Parnokji frontline workers 32,440, healthcare workers 11,241, arishi küm 45 ser temapur 53,932 aser arishi küm 18 nungi 44 tsüingda alir 139 lir" ta Dr Thurr-isa metetdaktüsü.

Mongulbarnü Prime Minister Narendra Modi den Cabinet züngsemtemi North East States nungi Chief Minister tem den senden amandang Chief Minister Neiphiu Rio-ia shilem agi.

"Onoki COVID19 wara indang tensa aser azüoktsü indang onüktem jembitep. NE state temi COVID-19 anema raraba nung Prime Minister-i süoki bilema inyakba atema pelar" ta Neiphiu Rio-i metetdaktüsü.

## Dimapur Railway Station nung train 14 anenzüktsü melar

**Dimapur, July 13, 2021 (TYO):** July 17, 2021 nungi Dimapur Railway Station nung train 14 anenzüktsü atema Railway kettangpurtemi temelaba agütsüogo.

Nagaland state sorkari Covid19 wara nung ajemdaker Dimapur Railway Station shibanga atatsü ashiba agi passenger trains manenzükdaktüsü liasü, ta Northeastern Frontier Railway (NFR) kettangsurtemi ashi.

"Dimapur Railway Station nung aluba passenger tem dak shirangba yimya malitsüla aser Covid19 vaccine indang dose anaprong agiba kulikaket alitsüla" ta Northeastern Frontier Railway (NFR)-i metetdaktüsüo.

July 17 nungi Dimapur Railway Station nung tsüinglanglen agüja

aliba train tem anenzüktsü melar, ta parnokisa ashi.

1. Train No. 05669/05670 Guwahati - Dibrugarh - Guwahati express special
2. Train No. 05603/05604 Guwahati - Ledo - Guwahati intercity express special
3. Train No. 05909/05910 Dibrugarh - Lalgah - Dibrugarh express special
4. Train No. 05901/05902 Lumding - Tinsukia - Lumding express special
5. Train No. 02249/02250 Bengaluru - New Tinsukia - Bengaluru superfast special
6. Train No. 05927/05928 Rangiya - New Tinsukia - Rangiya express special
7. Train No. 05967/05968 Rangiya - Ledo - Rangiya express special

8. Train No. 05905/05906 Kanyakumari - Dibrugarh - Kanyakumari express special
9. Train No. 03281/03282 Dibrugarh - Rajendra Nagar - Dibrugarh express special
10. Train No. 05959/05960 Howrah - Dibrugarh - Howrah express special
11. Train No. 05933/05934 New Tinsukia - Amritsar - New Tinsukia express special
12. Train No. 02503/02504 Dibrugarh - New Delhi - Dibrugarh express special
13. Train No. 02423/02424 Dibrugarh - New Delhi - Dibrugarh express special
14. Train No. 05903/05904 Dibrugarh - Chandigarh - Dibrugarh express special

## Covid putetaka meshirangertem pei kidang takdang balaka nung mongdaktüsür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nung er ama melentepa tamshi.

Mozü achitsü agüja lira, aji shitak chiang.

Tango junga mesashitetba, teku ashiba, aketba aser temang metaba timtem lira yakta doctor bushiang.





Deputy Commissioner, Mokochung, Limawapanga Jamir ajanga July 13, 2021 nü Deputy Commissioner, Mokochung indang office nung EAC Chuchuyimlang, Limakumla Pongen nem Oximeter amoktsüba mapang tangokba noksa ka yangi angur. Yimtsüng 95 nem ana-ana lema agütsüsü atema item Oximeter ya LADP 2020-21 fund nungi agizüka aliba alitsü.

### July 15 nü Core Committee senden ka amentsü

**Dimapur, Chiteni/July 13 (TYO):** State nung tzüngsarusatensa asadangsü aser mera balala agitsü atema Agriculture Production Commissioner, Y Kikheto Sema, IAS mendenpuba sür core committee senden ka July 15, 2021 anepdang 11:00 ako nungi Secretariat Conference Hall nung amentsü, ta sangdong ka ajanga ashi.

Tzüngsarusatensa agi kongshia aliba tesemtem nung

department ajanga mera balala agir aliba, tzübu mesemba, tzü-nokdang asadanga, awatsüng aser tzüpokdak tesemtem yanglushiba amala onüktem iba senden nung benoka jembitsü aser ano jelia metsü-jang lemtsüsü, temelen kiset shiruru metsüsü aser kongshia aliba tesem-i Core Committee/ketdangsürtem aotsü atema sentongtem yanglutsü, ta ashi.

Iba senden nung Agriculture, Horticulture aser

AH & Vety. Services, Fisheries & Aquatic Resources aser Land Resource Department shiai minute ter PowerPoint presentations agütsüsü. Item PowerPoint nungya timtem ajurua aliba farm aser Department balalai teyari agütsüba indang noksatem alitsü.

Iba senden nung core committee züngsemtem ajunga arua adentsü mepishir, ta sangdong ajangasa ashi.

### Tuensang DTF senden nung Unlock-II indang jembia

**Dimapur, Chiteni/July 13 (TYO):** Tuensang District Task Force on COVID-19 pur senden ka July 12, 2021 nü Deputy Commissioner, Tuensang indang Conference Hall nung mena liasü. Iba senden ya Deputy Commissioner aser Chairman, District Task Force COVID-19, Tuensang, Kumar Ramnikant IAS lenisüba kübok amen.

Tuensang District Task Force on COVID-19 züngsemtemi iba senden nung Unlock-II indang item guidelines ya yanglua liasü;

1. Dokan lapokba mapang dokan nung amenertemi parnok COVID-19 mozü agiba indang status nüburtemi angutsüsa ayutsüla.

2. Lower/primary class atema online ajanga sayuba ya angazüksü atema jangratemra masü, anungji DTF ajanga school tem dang lesson tem video nung yanglutsü atema tesayurtem shimtsü asoshi totuyuba agütsüsü lemet. Class agitsü atema Deputy Commissioner indang

Conference Hall amshidaktsüsü.

3. Ward ajak nem vaccination card lema agütsüsü atema Medical Department nem totuyuba agütsü.

4. Deobar shia vaccination Mela alitsü.

5. Kanga nüngdakba aser menüngdakba (essential & non-essential) osettem ayokba dokan tem anogoshi melentepa lapoktsü. Iba dak sendakba nung Administrator, Tuensang Town Council ajanga osangtem sangdongtsü.

### Women Helpline Nagaland ajanga metetdaksür

**Dimapur, Chiteni/July 13 (TYO):** Technical tebilemtsü kar mechi Helpline Number 181 ya tarutsü nung osang ka magütsü tashi mamshi alitsü, ta Women Helpline Nagaland ajanga sangdong ka nung

metetdaksü. Ajisüaka azüdokshi mesüra timtem ajurua aliba tetsürtem, mesüra tetsür dak sendakba scheme aser sentong tabu balala metetnertemi 9485239098 nung jembitsü

akok, ta sangdong ajanga ashi.

Ajidang masü, district ajak nung amenoka aliba Sakhi- One Stop Centres (OSC) nung oa item osang mesüra teyari ya agitetsü, ta Women Helpline Nagaland ajangasa ashi.

### Security Forces temi NSCN-K (Niki Sumi) züngsem pezü apu



**Dimapur, Chiteni/July 13 (TYO):** Security Forces temi Police den lungjemer general area Lower Agri, Kohima nung operation ka July 12, 2021 nü agidang NSCN-K (Niki Sumi) züngsem pezü pua liasüü.

Osang tejangja ka nung ajemdaker Security Forces aser police temi operation agiba mapang NSCN-K (Niki Sumi) züngsem pezü apu aser parnok ket nungi 7.62 mm AK 47 Rifle ka den magazine asen aser

injang 77, 9 mm indang injang ti den sen 11,500 nguteta liasü.

Pua alirtem den parnok ket nungi nguteta oset ya maneni asüngdangyatsü atema North Police Station, Kohima nem amoktsüogo.

### Speaker ajanga House Committee senden ayonger

**Dimapur, Chiteni/July 13 (TYO):** Nagaland Legislative Assembly indang Speaker, shiba House Committee indang Chairman lir, pai House Committee pur senden July 22, 2021 anepdang 11:30 ako nung amentsü, ta

metetdaksüogo. Iba senden ya Assembly Secretariat indang Committee Room nung amentsü. Iba senden nung Committee züngsem ajunga arua adentsü mepishir, ta sangdong ka ajanga ashi.

### Taoba MLA, Asür Dr. K.C. Nihoshe asükhü lemsatep

**Dimapur, Chiteni/July 13 (TYO):** Taoba mapang Nagaland nung MLA aser Parliamentary Secretary inyaka alisang Dr. K.C. Nihoshe tanü (July 13, 2021) Dimapur nung asüba ajanga ni aoksar aser kanga jashir, ta Nagaland Governor, R.N. Ravi ajanga sangdong ka nung ashi.

asenek asoshi ajemaluba lenir ka samaogo, shibai teti lokti ajungkettsü asoshi inyaka liasü, ta ashi.

Mangyimer kibong den asükhü lemsateper aser asür tanüla tesunep nung anisüngzükjangma, ta Minister Kronu-isa ashi.

Pa asüba ajanga state nung tejangja lenir ka samaogo. Nagaland nung aliba nüburtem aser kü tenüng nung asükhü lemsateper. Mangyim-jashi nung aliba kinunger nem iba tejashi koktetsü asoshi tashi agüjang ta sarasademtsür, ta Governor-i ashi.

Tanü Dimapur nung taoba mapang MLA aser Parliamentary inyaka alisang Dr. K. C. Nihoshe asüba osang angashia ni kanga jashir, ta Minister, Planning & Co-ordination, Land Revenue, Parliamentary Affairs, Neiba Kronu-i sangdong ka nung ashi.

Nagaland Pradesh Congress Committee tir, K. Therie-ia Asür Dr. K. C. Nihoshe kinungtsü Kitoli Yeptho, chirmur aser kinungertem den asükhü lemsatepa shidi ka zülua liasü.

Asür Dr. K.C. Nihoshe ya tabensa lenir ka liasü. Pa bendanga agütsür lokti meima nüburtem tenzük. Pai ken o ajak nung akang-akang nokdak, shiba ochishir ka liasü. Pa asüba ya Naga nung asoshi yanglushitsü makokba takoksa alitsü, shibai lokti ajungkettsü asoshi ano mapa jenti anüngdaka yutsür asür, ta Therie-i ashi.

Pa ya tejangja nübu ka aser dangar ajungmesoba lenir ka liasü, shibai yimten yimsüsür aser social worker ka ama jenjang balala nung nüburtem tenzükogo. Pa asüba ajanga

NPCC nung züngsem ajak tenüng nung asükhü lemsateper. Tulusang Tsüngrem nenok den liang aser nenok molung anisüngzükjangma, aser pa tanüla tesunep nung anisüngzükjang ta sarasademtsür, ta paisa ashi.

### Security Forces temi temesepba mozü ayoker ana apu



**Dimapur, Chiteni/July 13 (TYO):** Security Forces temi Police den lungjemer general area Surumi, Zunheboto district nung July 12, 2021 nü operation ka agiba mapang temesepba mozü ayoker nisung ana pua liasü, ta osang ka ajanga ashi.

Zunheboto district nung operation agiba mapang temesepba mozü ayoker ana apu aser tena ket nungi SP tablet 555 aser mobile phone ka nguteta liasü.

Osang tejangja ka aruba nung ajemdaker Security Forces aser State Police lungjemer Surumi,

Ken o maneni bushisüngdangtsü atema pua alisang nisung ana den tena ket nungi ngutetba oset ya Suruhoto Police Station, Zunheboto nem agütsüogo, ta osang ajanga ashi.

### Wokha nung World Population Day aser Stabilization Fortnight amungtsü

**Dimapur, Chiteni/July 13 (TYO):** Wokha Medical Department ajanga July 11 nungi tenzuka July 24, 2021 tashi World Population Day aser stabilization fortnight amungtsü, ta sangdong ka ajanga ashi.

Iba dak sendakba nung temsüa aliba apuani temi item service ya District Hospital aser sorkar meyong Health Care Center tem nungi agitsü akok, ta ashi.

Iba mapang angati family planning, Copper-T, condom, oral contraceptive pills aser vasectomy angati agütsüsü, ta Chief Medical Officer, Wokha, Dr. C.W. Tungoe-i sangdong ka

Iba sentong asoshi nüburtemi ASHA worker mesüra healthcare worker den tongtepratepa osang tali tejangjaba metettsü akok, ta sangdong ajangasa ashi.

## Alemlin nung nashi akhümtsüba arur: Assam CM

**Guwahati, July 13, 2021 (Agencies):** Chief Minister Himanta Biswa Sarma-i assembly nung benokba 'cow protection bill' ajanga nashi shi machirtem alidak nashi tepsetba aser nashi shi ayokba noktangsü.

Assembly indang budget session tenzükba anogo nung Chief Minister-i iba bill benok.

Iba bill ajanga tekülem ki telongtet kilometer 5 nung nashi shi ayoktsü memelar, ta CM Sarma-i ashi.

"Alemlin nung asen loktiliba nung nashi akhümtsüba arur. Asen tamangba yimsü inyakyim aser tsünüsenbongba nung nungdakba akhümtsüba onoki Assam Cattle Preservation Bill,

2021 benokogo" ta paisa metetdaksü.

Iba bill ajanga kulikaket tejangja melii Assam kübok district balala tsüingda aser state adena nashi belenba noktanger.

Assam governor Jagdish Mukhi-i assembly session nung bill benoktsü ta osang metetdaksüba sülen nung nübortemi iba bill atema tebilemba balala lemsatepa arur.

"Tongti onüktem nung asenok piladaksütsü atema iba mapa ya inyaker. Shitakba agibo iba bill yutsür developmental bills nung ang temolong agütsütsüla. Anungji, iba ama mapang ka nung ashishitep aketba bill bener marutsüla. Covid indang tensa

ajurua lir aser iba ama tensa ka nung Assam Cattle Preservation Bill, 2021 ajanga loktiliba nung tensa tamajungba kümdaksütsü" ta Gauhati High Court Senior Advocate, Hafiz Rashid Choudhury-i ashi.

"Item amala Bill ajanga telok kari tanga teloktem timtemdaksür. Anungji asenoki iba bill ya agizüktsü süra, telok balala indang temetentem alema meyanglutsüla. Iba bill ya telok kar atema lendong masütsüsa sorkari mapa inyaksüla" ta MP & Veteran Journalist, Ajit Bhuyan-ia metetdaksügo.

Assam Cattle Preservation Bill, 2021 ya agizükra, iba yagi Assam Cattle Preservation Act, 1950 melenzüktsü.

## Himanta Sarma-i Gauhati High Court nung CJI inyaksüla: Akhil Gogoi

**Guwahati, July 13, 2021 (Agencies):** Assam chief minister Himanta Biswa Sarma ya Gauhati High Court nung Chief Justice inyakdaksütsüla, ta MLA Akhil Gogoi-i ashi.

"Tai tonglokja alirtem dak injang khaloktsüba manenra, Assam nung okadak ajak shibangtsüla" ta Gogoi-i ashi.

"Chief Minister Himanta Biswa Sarma ya Gauhati High Court nung Chief Justice inyakdaksütsüla. Pa ya Chief Justice, Chief Minister aser head of police kümdaksütsüla" ta Akhil Gogoi-isa CM Sarma aija jemi.

Tai tonglokja alirtem dak injang khaloktsütsü melena ketdangsurtemi parnok ken o tem angadangtsüla. Parnok ozüngi melaba ama merenshitsüla, ta paisa ashi.

"Parnok khasetra, parnoki nem shibai mapa inyakdatsü'ar memetetsü. Bubu Konwar nem nisung tepsettsü atema shiba sen agütsü? Item kuli kodanga memetetsü" ta Gogoi-isa ashi.

June 1, 2021 nungi Assam nung tai tonglokja tepuokdak



Akhil Gogoi

ayurtem mesüra police-i mita aodang injang khaloktsüba lendong 20 tema atalokogo. Iba mapang tai tonglokja alir kabo khasetogo.

"Ozüng alema inyakerteri jena aotsü merangra, parnok dak maneni injang khaloktsütsütsüla" ta tawa tu Assam Chief Minister Himanta Biswa Sarma-i ashi.

"Redefining Policing Standards in Assam" indang mungdang nung jembidang CM Sarma-i "police-i parnok dak teku nung injang khaloktsütsüla saka ozüngi tetsüng nung dang akhatsü melar" ta ashi.

## Tripura Governor tasenba Agartala tongogo

**Agartala, July 13, 2021 (Agencies):** Hombar anüngdang Tripura Governor, Satyadev Narayan Arya Agartala tonga aruogo.

Maharaja Bir Bikram Airport nung Chief secretary Kumar Alok, director general of police VS Yadav aser West Tripura district magistrate Devapriya Bardhan nungertemi Tripura Governor pelaa agizük.

Satyadev Narayan Arya ya

Tripura nung 19 buba Governor inyaksü atema tawa tu shim aser pa Raj Bhawan-i aodang guard of honour ajanga agizüka liasü.

Raj Bhawan nung chief minister Biplab Kumar Deb, deputy CM Jishnu Dev Varma, revenue minister NC Debbarma, education minister Ratan Lal Nath, social welfare & social education minister Santana Chakma, Assembly

Speaker Rebati Mohan Das aser MP Rebati Tripura nungertemi Arya pelaa agizük.

Satyadev Narayan Arya-i Ramesh Bais melenzükter aser Ramesh ya Jharkhand nung Governor inyaksü shimogo.

"Tripura aser state nung alirtem tejakleni aotsü aser renloktsü atema mapa inyaksü aser iba nung ajaki yaritepsü mepishir" ta Tripura Governor Arya-i ashi.

## Manipur nung COVID-19 osang tiyazü prokshir 3 apu

**Imphal, July 13, 2021 (Agencies):** COVID-19 osang tiyazü prokshiba atema Manipur police-i nisung 3 puogo.

Deobarnü Imphal West police-i nisung asemji apu. Parnoki video ka yanglushi aser iba sülen Facebook nung upload asü.

Par asemji Thaodem Romesh (34), Thaodem Bikram (43) aser Sougrakpam Johnson Singh (34) nunger lir ta

jangaog.

Thaodem Romesh-i Honibar nikongdang Facebook nung parnoki yangluba video ji upload asü.

Takyel Khongbal nung lokti COVID-19 testing asüding nisung 700 nungi 500 dak COVID-19 putet ta video nung tiyazü shia lir.

Police-i bushisüngdanga aodang Progressive Youth Development Organisation

(PYDO) ta ser WhatsApp group ka nung Thaodem Romesh-i video ji angu. WhatsApp group nungji Thaodem Bikram-i iba video upload asü.

Bushitepa arudang iba video ji Sougrakpam Johnson Singh-i osang tiyazü enoka yangluba liasü ta metet.

Imphal West district magistrate-i Lamphel Police station nung FIR benokba nung ajemdaker par asem apu.

OFFICE OF THE  
UNGER KOSASANGER PUTU MENDEN  
(Village Council)

### TEPELA LEMSATEPER

Tanü alima ajunga nung mapang talangka (Covid-19) agi meimchir tulu tila kecha tebandang makai timtemtepa mapang ka nung ozü lenir tajung Wb. Imnatiba, Hon'ble MLA & Advisor, Industries & Commerce, Labour & Employment Skill Development and Entrepreneurship Government of Nagaland ajanga yimsüng telong nung kanga dang nungdak-a aliba koba OXYGEN CONCENTRATOR tajung ka agütsügo, iba asoshi yimti nübör ajak tenüng nung Unger Kosasanger Putu Menden ajanga kangasa pelaba lemsateper aser mapa tajung asoshi tenüng tali asanger.

Teyanglur Tsüngremi par kibong aser pa wadang tali maojangma.

Sd/-  
R. TALI IMSONG  
Chairman,  
Unger Vilalge Council.



RINGWORM, ECZEMA  
ASER TEMANG  
MESAKBA AGI  
TIMTEMER ASÜ?

HAO



**ZALIM LOTION**

Fastest > Trusted > Tested

...By Generations

Medical  
store  
nungi  
aliang



# TIR YIMYIM

## YIMOBILEM (EDITORIAL)

DIMAPUR RASEMNÜ, CHITENI (JULY) 14, 2021

### Terepranger tajung

**T**aoba ita nungi tan Hombar anepdang tashi alima nung football asayamong tajungtiba ana, Copa America aser Euro 2020 amuia junga mao jangratema reprangtepogo. Iba mapangbo asayamong ana rongnung asaya kabo asen lima nunga asayatsü amato, pei kidang aser pei gari nung pei pei sapuba asayar kin wako songteper mongtepogo. Aji oda, kar kidang aser gari nung Brazil flag, kar Argentina flag ano karbo Germany, karbo Italy, karbo France, kar Portugal aser karbo England wako ta songer angudang, parnok limatem dang nungibo asen limaang telemsaba asütsü amai repringogo. Ita songtema telok balala pu sema football repringtep dang, ashiko, asenok rongnunga tamajung tentepa repringer alitsüa akok. Item ajakji asenoki football asaya meimba aser repringtsü jangraba agi lir. Ano, talisa Euro 2020 final asaya dena London nung asayaba angudang, asenok aikati asen lenir Dr.T.Ao-i mezüing India nung 1948 kum Olympics nung football asayatsü anir aoba otsü bilemteta repringer alitsü. Atangji, football ya shi azü ajak jaa atua asayaba dang masü saka tereprangertema dena memeteti tetsüing teben arakzüka repringra asaya ka lir, iba jagi balaka Naga nungertemi jangrar asütsü. Ibayongji, Nagaland nung kum shia tesem tesem nung football asayamong asaya ayongzüka asayar. Naga nungertemi football jangraba kuli kaji, Naga nung yimtsüing shia nung tasazük shitakbo masütsüa akok saka football asayadak ground kabosa angutsü. Aji oda, football yabo Naga nung ajaki jangraba asaya ka lir saka tesasatsüka football asayaba agi rongsen küma asenoki masayatetter, anungji asenok atemabo football asayaba ya rongsen aser tenüing tajung aatsüba mapa ka masü saka benjongbentsü nung peladoktsü asoshi asayaba asaya ka dang kümdaktsür. Atangji, football ya ayongayonga kazüa chiyongertem asayaba asaya ka masü aser pei chinütsü chiajema alirtem asoshia masü saka iba asaya ya temeranger aser peisasa pei taküm azüoka alirtemi dang rongsen küma asayatetter. Tanü alima nung football otsü nung Naga nung asoshibo Dr.T.Ao oagi London nung India nung captain ser asayaba otsüji mezüing dang masü tesüsaba otsü kümdaktsüogo. Jungjunga bilemdangra, 1948 kum Dr.T.Ao-i anir India nung football asayaba otsüji tamakok otsü lir, kechiyong parnoki France goal 2-1 agi makok. Ajisüaka, iba mapang nungji oagi Olympics nung shilem agitetbaji India nung asoshi tuluka liasü aser India nung Team captain asütsü Aor chanu ka shimtetbaji pongmang amai tamamangtsü takok aser tenüing tajung tulu bener arutsüba ka liasü. Ibaji apibo, tang yabo India nungertema World Cup nung tangar kintem den toktepa asayaba kin ka kümer alitsü tim aser Naga nungertema India team nung asayar anasemkabo teti alitsü tim. Ajisüaka, Naga nung football otsüji repringdangra, Dr.T.Ao sülenbo football asayaba nung masü saka terepringba nungang temulung tagütsüba amato kumogo. Atangji, koba asaya südir süaka, terepringer ali nung dang jangratema repringer, iba jagi asenokbo tangar adoksa asayatsü jangrateper masü saka tangar asayaba repringtsüang tepringraba akümer südi. Alima nung mapa shia telok ana asütsü, telok ka asayatsü aser kati repringtsü; telok kati yanglutsü aser kati alia amshitsü; telok kati ayoktsü aser kati alia achitsü aser ajemtsü. Item telok ana rongnungji asenok terepringer, tamshir aser tachi tajemertemji lir. Ashi, tang yabo asenoka terepringer aser tachi tajemertem dang masü saka asayar tajung adoktsüsa Nagaland nung district shia nung football ground tajung kakabo yangluteta akatsüla aser Sports School-a tenüing agi masü saka shitakba asangang nung tangar kintem den raratsü renemer amai bendanga agüja sayudak district shia kakabo akatsüla. Tsüngremibo Naga nungertem nem alima nung nungtugu küma shilem agitsü asoshi sempet aika agüja lir saka asenoki item sempettemji mamshitet menendoker. Item ajakji asenok ochimashi aser mazüokba ajanga lir. Stadium ka kum metsü nunga merenemtet shizüka odaktsüba state-ji, India nung ta masü, alima nung Nagaland dang asütsü. Iba ama state nung kodaser asayar tajung adoktsü? Asenoki stadium dangbo sen temeimba, iba jagi stadium merenemtetter aser lishibosa memezüi asayatsüsa football ground-a, Kohima nung anarongdena ka akaba dak alaka, tanga district-tem nungbo meyanglutetter. Asenok dak ochi mulungsentsü tasen ka pokteta lanurtem sempet agi rongsen küma yanglutetsüsa meinyaktet tashi, asenok yabo mobile game asayaba nung aser tangar asayaba repringba nung dang temaba jenjang tongtettsü. Aji khen arokaroka bilemdangdi.

# OLEMSABANG

## KINUNGTSÜ ASER KINUNGBOKÜLEM-SANNÜKER MAPA

- Imnabenla Jamir (Bangrapet)

### Mapa tasen inyaktsü jangratsüla

Putu ka nung tetsüri school nung tesayur inyaktettsü na? tanurtem azüoktetdi ma? SDO, DC inyaktettsü na? ta bilem. Saka parnoki tebur den kasa, mesüra tajungba inyaker ta tanü aikati jembir aser mapa agi sayuogo. Sensaksem mapang lenir karibo yamala külem-sannükba inyakyim ya Anülulen (Western)lima benshiba mapa ka lir aser asen lima nungbo mapetsü alitsü ta terata o shisemogo. Tangbo mapettsü, mapangi bener arutsütsü - mapangji kodang arutsü? nisung kar asü atar asü? Temelenshiji tanü asen tendak metenzükra kodang tenzüktsü? Ano karibo apuani anaprongla Arogo tenzükba mapa nung lidir, chirnurtem shibai anepalutsü?ta terata o shisem. Ano kar-i Lipok 2:18 nung ajemdaker tetsürjitekolak mesüdaktsütsüla kechiaser tetsürji 'teyariteper' ka asütsüTsüngremi yanglu aser sati kulizüing agidang-a yamaji nangzüker akümer ta tangatetba lemsatep. Ibri oshi nung "Ezer" tetezü "helper" ya Tsüngrem ta shia lir (Anitet 18:2), tashi tuluba, kin tuluba kati dang teyari agütsütsü anak. Saka Aori helper - teyarir ta asüba ya kidang mini-kancha ayuba den medemdanga tetsür jenjang ratetba agi lokti aser arogo nung tang tashi toklang tenzükba mapa nung tebandang atokba lir. Ano Ibri oshi nung "ezer" ya kati dangbo meinyaktetba ka inyaktsü yariba den medemdangtsü akok. Talisa T. Ken nung aiben KIBUBAJI kü teyari ta alibaji Lipok nung aliba denji kasa. Tsüngremji teyari ka lir. Yisui Tanela Temeshi teyarir asütsü yoktsü ta ashi. Teyarir ta asübaji kilir amai mangatettsüla aser teyari ta asübaji jenjang tekübokba amai mangatettsüla. Tebur bilemba tsütsü atsünga Lai mashi ratetba ajanga tetsür tenzükba maparen jendoka lir. Laishibai arogo aser arogo tajaba kechi ashir, tenzükba indang kechi ashir aji meyipa repringshi nungdak ta ajiteter. Asen lima nung külem-sannüker ya mapa tasen saka tasü ita tenzüktsü mapang tongogo. Anungji theologian ka den kibong küma lira tangatetep nung tapet mapa inyakdaktsütsüsa arogoi leman lapoktsütsü nungdaka kumogo.

### Teinyaktsütongtibang kar

1. Arogotem nung deacon asertoklang tenzükertem arogo inyakyim koda melenshia aor aser koda tashi taitba nung inyaka aotsü shisadokden mapang shia akatsüla. Akhi mapa dang masü, mapa tasen inyaktsü jangratsüla.
2. Mapa küma aotsü asoshi Mungdang lenir aser arogo nung Toklang tenzükertemi nübur nem rajema angatetdaktsütsüla.
3. Laishiba tekong ishika shimea yangji ajemdaker tajung - majung, tagitsü - magitsüo lepdang magütsütsüla. Laishibaji kechi tensa nung zülu aser aji asen nübur dak apet ratettsüba tonttibang.
4. Yimtsüing Arogo kar nung rongsenttsütsü tashi melira, ABAM-i aser jila arogotemi iba khuret lemsatepsüla
5. Arogo nung sannükershimdang kinungtsü/kinungbo teinyaktsü shimtsü (options) kibong nem agüja par nem latetdakjang.

### Teshisadangtsü ka

Külem-sannüker ta asüba ya tetsür jenjang bushiba ka dang, mesüra anülulen inyakba tangatetba ka indang jembir ta mangatettsüla. Saka tenzükba mapa nung ochi teinyaktsü ka ta angatettsüla. Alima melenshi aoba den arogo aika nung Külem-sannüker mapa inyaka odagi aser arogo aika nung tajangzük anguba kuli lir. Theological college nunga kinungtsü aser kinungbo anaprong sayudaktsüba ajanga children education allowance, medical allowance, ki amala nung sen talila meindoki anapronglai tenzükba ajangshia arudagi. Yihusua 24:15c nungji ashir, "Saka ni aser ozü kibongibo, onoki Kibubaji tenzüktsü." Süra, Arogo nunga külem-sannüker asütsüji tamakoktsü masü ta bilemer. Tasen Lai nunga Pricilla aser Aquila külem-sannüker inyakba angur. Yisu Khrista-i aser Laishiba-i shianga tebandang makai ajak Tsüngrem mesükba nung yanglu. Tsüngrem aser Arogo wadangi tebur dang lenir asütsü ta Laishibai mesayur. Anungji lenir C. Walu Walling-i ashiba ama "Arogo tulu-tila-town-yimtsüing kecha melemsai ... ajaki agizüktepa bener aotsü nungdak. Iba temelenshiji shibai kong nungi, kodang tenzüktsü ta ataa melii 2022 nungi tenzüktsü pastorbai anir arogo nung den sarasadema mapang tenzükang. ABAM nung telemtetba agir külenang inyakdi ta atadang mapang tajungji süitemtsü." Anungji külem-sannüker mapa ya inyaktsü mangdang agüjang ta sarasademdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Delhi nung DDA ketdangsertemi Syro-Malabar Tenla ki bendoktsü



Delhi Development Authority (DDA) tetuyuba nung July 12, 2021 nü Delhi kübok Lado Sarai kiyong nung aliba Syro-Malabar Arogo Tenla ki bendokja aliba noksa nung angur. Delhi Development Authority (DDA)-i iba Tenla ki ya ozüing alema asü, ta aitsür saka Arogoibo, iba mangatettep ken o ya court nung benoka lir, aser obendang magütsü saka ketdangsertemi Tenla ki bendoktsü, ta DDA aitsüogo.

**New Delhi, Chiteni/July 13 (Agencies):** July 12, 2021 nü India yimtiba, Delhi nung Delhi Development Authority (DDA) tetuyuba nung Lado Sarai kiyong nung aliba Syro-Malabar Arogo Tenla ki ka bendoktsüogo.

Syro-Malabar Church kübok Little Flower Arogo Tenla ki bendoktsüba dak sendakba nung osangbenertem den jembidang Faridabad Arogo nung Public Relations Officer, putir Ginto K. Tom-i, "Tesüiba küm 13 tashi onoki iba Arogo ya ketdangsüa liasü, aser onoki timtem kecha majurui aruogo, ajisüaka tawa Delhi Development Authority-i, iba Tenla ki ya ozüing alema asü ta tai tongloksü. Onoki teyari bushitsü aser maneni telemteba agia inyaksü," ta metetdaksü.

"Kedangsertemi jelia osang kecha memetdaksüü iba Tenla ki bendoktsüba ajanga onok aoksar aser jashir. Parnok anepdang aruba sülen ozü staff tem dang Tenla ki azüingtetjang ta ashi, iba sülen parnoki Tenla ki ajak bendoktsü," ta paisa metetdaksü.

"Sorkari iba amai inyakba atema onoki kanga sasar. Mangatettep kar ali nunga ibaji ozüing ajanga dang bentettsüla. Teti agia tekülem kitem bendoktsüba ya melung

raksatsüka lir. DDA-i parnok melung agi Tenla ki bendoktsü amai onoki bilemer, anungji onoki temaba ketdangsertem den tongtepratepa jembitsü aser maneni telemteba agia inyaksü," ta paisa shisem.

DDA ketdangsertemibo, iba Tenla ki ya ozüing alema asü, ta ashir. District administration-i sangdong ka ajanga, iba Tenla ki ya ozüing alema gram sabha li nung asü; yangi nisung kari ali atsünga tekülem ki yanglu, ta metetdaksü.

"Lia aodang tamangba yimsü kiojen ulushiba mapang iba area nung ali atsünga agi, anungji BDO office-i ozüing alema yangluba kiojentem bendoktsütsü meranga liasü," ta kasa sangdong ajangasa metetdaksü.

July 7, 2021 nü Block Development Officer (South)-i ali atsünga agirtem dang anogo asem tsüingda ali atsünga agia alibaji azüingtetjang, ta tuyua liasü. Ajisüaka Little Flower Arogo nung Pastor council member aser lawyer John Thomas-ibo, ketdangsertemi Arogo nem shidi kecha magütsü, ta shiogo.

Syro-Malabar Arogo ya tongtibangsüa India south tsütsülen Kerala, Tamil Nadu aser Karnataka state tem nung lir.

Iba dak alia Delhi, Haryana, Punjab aser Himachal Pradesh state tem nunga lir. Uttar Pradesh kübok Gautam Buddha Nagar aser Ghaziabad districts aser union territories of Jammu & Kashmir nunga Syro-Malabar Arogo tem lir.

Delhi Development Authority (DDA)-i iba Tenla ki ya ozüing alema asü, ta aitsür saka Arogoibo, iba mangatettep ken o ya court nung benoka lir, aser tang tashi court-i obendang magütsü saka ketdangsertemi Tenla ki bendoktsüogo, ta DDA aitsüogo.

Global Council of Indian Christians (GCIC) Tir, Sajan K. George-i, "Iba mangatettep ken o ya court nung benoka lir aser tang tashi ken o mangadang, ajisüaka Delhi Development Authority-i Delhi nung aliba Syrian Malabar Arogo Tenla ki bendoktsüogo," ta aitsü.

"Tenla ki bendoktsübaji GCIC-i sashia aitsür; iba ya Khristantem anema inyakba mapa ka lir. Khristan nütsüing ishikadang asüba agi iba Arogo anema inyakogo," ta George-i ashi.

Malabar Coast (tang Kerala) nung tentetba Syro-Malabar Catholic Arogo ya East Syriac rite sülen anidakba tongti Arogo ka lir.

## UCF ajanga India nung tepuokdak alir Khristan 84 bo chiokogo

**July 13, 2021:** India nung Khristantem temeden atema inyakba telok- United Christian Fellowship (UCF)-i, taküm küm tenzüker January ita nungi June ita tashi nung India nung teyari meshia UCF helpline dangi call 1,137 aru; yamaji UCF-i yaritepa tim ketdangsertem dang item onük benoka liasü, ta metetdaksü.

UCF team-i inyakba ajanga India nung tepuokdak alir Khristan 84 chiokogo aser shibangia aliba tekülem ki 29 taneben lapokdaksüogo, ta metetdaksü.

Ajisüaka UCF ajanga first

information reports (FIR) bo 19 dang benok, ta parnokisa metetdaksü.

India nung loktii Khristantem dak azükba, tekülem sentong tagidak mapang timtem agütsüba aser pastor densema tekülem sentong nung adenertem dak azükba kanga bulua atalokogo.

Chief Justice Dipak Misra leniba nung Supreme Court-i India sorkar dang loktii nisung dak azükba anentsü atema inyakang ta tuyua liaka item ama tatalokba manener.

Item tatalokba nung tetsür 600 dak tema aser tribal nisung aser Dalit nung densema

nisung 400 dak tema yiruogo, ta UCF report nung shia lir.

Taküm küm June ita tashi nung Tenla ki aser tekülem ki raksatsüba tatalokba 18 liasü, ta parnokisa metetdaksü.

Taküm Freedom of Religion Act kübok ken o tenet benokogo. Item ama ozüing ya state kar nung 1967 küm nungi benoka lir, ajisüaka nisung kar kangshia tamangba yimsü meyipdaksüba ken o nung Khristan ka danga aija mali.

2020 küm tashi nung India nung nütsüing billion 1.38 lir, ajisüaka iba nungjagi nütsüing shilem 2.3 dang Khristantem lir.

## ANOGO ABEN TSÜNGREM DEN

### Aria bilemba temeim

"Aser Pa adokdang nisung telok tulu ka angu, aser Yisui parnok asoshi aria bilema, parnok shirangertem aneptsü." Mathi 14:14

Aria bilemba temeim ya tangar timtemba reprangteta ji agientsütsü apusodaktsüba temeim dang ajar. Timtema alirtem asoshi temeimji mapa agi sayutetba dang ajar. Meima bilemba dang masü saka temeimji mapa akümbaji tongtipang. Asenji tangar tia kasa nungji ali asübo koda süla ta bilemer külen, aseni parnokji meyari tashi tesünep mangubaji Aria bilemba temeimji lir. Kodang Yisui telokti anasaji nokdak Pai parnok taküm otsü, tia aser timtem ajak ateta angu aser iba jagi Pa temulung raksa, Pai aria bilem aser Pai temulung ajak agi yarinüa ait. Yamaji Pai parnok aneptsü. Yisui yamaji mangyima alirtem, zütsüra keter alirtem, makamaitertem, amitsürtem, tsürabur malirtem, temenen tanela agi pur alirtem aser iba mesükba tia tamajung balala nung alirtem ngua Pa temulung raksa.

Tanüa asenok iba amala tia nung alirtem ajak ngua Pai yariner, aneptsüner, asen timtem nungi anitetner. Arungma Pa anasa odi.

### SARASADEM

Onok onsara temoatsüba kechiyong onok asoshi aria bilema meimba Yisu, nai ozü timtem aser nungdak ajak angur. Ne nem tenüngsang agütsür. Amen

## Tang mezüing International Religious Freedom Summit tenzükogo

**Washington DC, July 13**

**(Agencies):** Mongolbarnü (July 13) Washington D.C nung tang mezüing International Religious Freedom Summit tenzükogo; iba senden nung adentsü atema sorkar lenirtem, melungtet telok balala nungi lenirtem, mongintem aser tamangba yimsü balala nungi lenirtem adenshiogo; iba senden ya July 15 nü tembangtsü.

Anogo asemnü senden nung tamangba yimsü balala nungi lenirtemi alima tesem ajaklen tamangba yimsü sadoka amangtsü temeden atema jembitsü.

Iba senden nung tongti o jembitsüpurtem rongnung House Speaker Nancy Pelosi, D-Calif., taoba mapang US Secretary of State, Mike Pompeo, Tibet nung lenir Dalai Lama, USAID Administrator Samantha Power, White House Faith-Based & Neighborhood Partnerships Executive Director, Melissa Rogers aser USAID faith-based office director, Adam Phillips nung densema lir.

Kasa senden nung Pakistan tsür Khristan Asia Bibi, Sudan tsür Mariam Ibraheem, meimchir temeden atema inyaker China nung, Chen Guangcheng aser Boko Haram kiralongrartem ket nungi jenbur, Joy Bishara nungeria jembitsü.

Linük aika nung tamangba yimsü nung ajemdaker reshikangshiba kanga bulua kümдар aser religious freedom jenjang tamajungba kümдар.

China nung Chinese Communist Party (CCP)-i maneni tamangba yimsü balala anema inyaker aser North Korea nung Khristantem kanga mejungi reshikangshiba densema linük aika nung Khristantem kanga reshikangshidar.

Africa nung aliba Nigeria linük nung Fulani aser Boko Haram kiralongrartem aluyimer Khristantem jenti tepseter; Middle East nung aliba linüktem nung Muslim yimsü alia amanger kiralongrartem Khristantem jenti tepseter aser Pakistan nunga tsüingrem mezüingmeshiba ozüingtem nung ajemdaker Khristantem, Sikh nung aser Hindu nung densema minority tem anema inyaker.

2021 IRF Summit nung item tatalokba nung ajemdaker o lemteptsü aser alima tesem ajungalen tamangba yimsü ajak sadoka amangtetsü atema inyaksü asoshi jembitsü.

International Christian Concern nung Advocacy Director, Matias Perttula-i, "2021 International Religious Freedom Summit ya tang

mezüing ayonga amener, aser iba ya reshikangshi tia nung aliba Khristantem aser tanga yimsü amangertem temeden atema inyakba organizations asoshi maongka tajung ka lir; kechiyong iba senden ya ajanga alima tesem ajaklen mapang ajak nung nisung ajaki tamangba yimsü sadoka amangtetsü atema inyakba nung yaritsü," ta metetdaksü.

**OLONG PAITEP # 5874**

	1		2							3
4					5		6			
7										
			8							9
10									11	
								12		
13									14	
15										

**TIPILEN**

- 1. Taochi sayuba - 10
- 4. Temezüng agi kongshi - 4
- 5. Ainer - 6
- 7. Chiyungnü - 3
- 8. Mi nung atsük - 5
- 11. Asen masü - 3
- 13. Lenmang ajurutepdak - 6
- 14. Yangi masü - 4
- 15. \_\_\_\_\_ jang - 6

**LANGTSÜNGLEN**

- 1. Menungra - 6
- 2. Mi tsükloker mesepba - 4
- 3. Süngo o tzü ajemba - 5
- 5. Temenemsü tajung - 7
- 6. Idak - 4
- 8. \_\_\_\_\_ ok - 4
- 9. Tebangi apuba kongki tapu ka - 6
- 10. Tashi endokba metet - 5
- 12. Tzü manung senzüba - 4

**OLONG PAITEP # 5873 TELANGZÜBA**

**LANGTSÜNGLEN :**

- 2. Kan, 3. IM, 5. Anüng, 7. Amsü,
- 8. Yosep, 10. Sara, 11. Isak, 13. Yakob,
- 14. Nana, 16. Noa, 17. Am.

**TIPILEN :**

- 1. Rebeka, 4. Adam, 6. Yohan,
- 9. Zü, 12. Sayutsüngir, 15. Ku,
- 16. Naman, 17. Abel, 18. Samuel.



**AOR SOBALIBA WAZÜKA AYÜTSÜ SHISATOKDEN ALIR**

- Mapa tenzüka sarasademtsü : Rev. Jonathan Jamir.
- Oshi Oben teratet ashitsü : Prof. James Longchar.
- Subosolemstü teratet ashitsü : Dr. Miss. Rosy Lemdur.
- Jaya-Jako & Nungja-Koja : Dr. Miss. Lily Ozüküm.
- Benjong-Bentsü teratet ashitsü : Prof. Wilson Pongener.
- Külem-Küja teratet ashitsü : Prof. Armstrong Aier.
- Onir : Tanga otsüren ajak toktsür tamasa Aor senso tajung ajaki Tsümar & Foreigner tenung masü, saka asenAor sobaliba tetezü aketba tenung ajatsü angazükdi.

Lilir : L.Kika Pongener

**TANÜBO NAI LANGZÜANG**

Q. GIFT City ya koba State nung lir?

- A.Gujarat B.West Bengal C.Karnataka D.Kerala

(Taruba adok nung onoki langzüksü)

YASHI ADOK TELANGZÜBA : 2012

**AO OSHI ANGAZÜKDAK:**

TANÜ ANGAZÜKTSÜBA OJANG



**Kechiba**

(adv) tatalokba mesüra tebilemba metetnüa asüngdangba (why)

· Kechiba Tsüngremi asenok meimer ?

**Kichiba**

(n) ki tiplen enokba kishi ( side door, window)

\* Ki yanglu dang **kichiba** peria enoka yanglutsüla.

**NAI-A YA METETTER MA?**



Blokhus, Denmark nung sandcastle talangtiba ka yangluogo. Iba sandcastle touzük ton 5,000 jungnüa aser metong nung metre 20 dak tema talang lir; aser alima nung sandcastle talangtiba asütsü. Iba sandcastle metong nung metre 21.16 (süklep 69.4) lir, koba 2019 küm Germany nung yangluba sandcastle (17.66) dang nungi meter asem dak tema agi talangba asütsü, ta Guinness World Records ajanga metetdaksü. Dutchman Wilfred Stijger den alima nung sand sculptor tajungtiba 30 agi yaria iba sandcastle yanglua liasü.

**SUDOKU # 5914**

		9	6		2		
5	2			7	1	6	4
8	6					7	
	3	8			7	4	2
6		5	1	2	4	8	7
	4		3				
	1		7	5			
			2	4	3		1
2	5	6	8		9	7	3

**TELANGZÜBA # 5913**

8	5	7	6	9	1	2	4	3
9	2	6	4	5	3	7	8	1
4	3	1	2	8	7	5	9	6
7	6	3	5	1	8	9	2	4
1	9	4	7	2	6	8	3	5
5	8	2	3	4	9	6	1	7
3	1	8	9	7	5	4	6	2
6	4	5	8	3	2	1	7	9
2	7	9	1	6	4	3	5	8

**OJANG LUTEP # 5459**

JANTEGJA :

LIKU :

AKAMI :

GARTAN :

NGDA :

ITA :

ASPUTÜ :

GBAMERANJI :

NGOZÜI :

MELAMER :

**OJANG LUTEP TELANGZÜBA # 5457**

AIBEN SHIJEN SHIR MANGAI AIBELNRA TEMERENSHI TAPET AGÜTSÜTSÜ LANGA LIR

**TAN HOPTA ATEMA - KOMA SÜLA ?**

Q. Naga yimten tebilemstü ya tang amai tatembang küma melatettet, ano, küm ter süi nunga koma süla ?

Olong 20 shi nung July 16, 2021 tashi nung iba telangzüba ya onok dangi (e-mail - tiryimim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimim.in) ajanga yokang. Telangzubatemi taruba Honibarnü adoktsütsü.



6th pay commission panel-i, basic pay nungi NPA delink sütsüsi atema benokba anema Amritsar Civil Hospital nung medical aser health lokti tentet balala nungi züngsemtemi longkak aitba noksa nung angur.

### PM Modi-i July 16 nü CM 6 den Covid tensa asadangtsü

**New Delhi, Chiteni/July 13 (Agencies):** Ato Kilonser Narendra Modi-i Hokolbarnü Tamil Nadu, Andhra Pradesh, Karnataka, Kerala, Odisha aser Maharashtra chief minister tem den sensak asemstü. Item state tem kübok district aika nung Covid-19 tashidak menar timba küma odar mesera tajemba mekümi lir. Mongolbarnü North East CM ti den sensak asema sülen taruba senden state 6 nungi CM tem den amentsü. Mongolbarnü sorkari ashiba agi, July ita tang tashi nung Covid-19 tashidak potetertem ya shilem 73.4 bo Kerala, Maharashtra, Tamil Nadu, Andhra Pradesh aser Odisha nungi lir. Osang benertem den sensaksema mapang ketdangsürtemi, India kübok

district 55 nung positivity rate shilem 10 dak tema lir, ta metetdaksü. PM Modi-i Mongolbarnü northeast state nungi CM tem den virtually senden ka ayongzüka menogo. Senden nung pia, raliwalir mongjentem nung nisung tali adenshiba aser shishilembadak mask mesemi senzüba aser lokti nung tetsüngda ita inyaksangshi masüba tebilemsü lemsatop. PM-isa, coronavirus wara den raratsü atema linük nung vaccine agütsüba sentong takaratiba nung inyakyonga aotsü nüngdakba lemsatop. "Covid-19 tashidak menar tali küma odar. Tensa züüoktsü atema tekübokba jenjang nung inyakyim shidak benoka inyaktü nüngdaker.

Iba ken o ya tebilemsüka. Covid-19 dak sendakba yimyayimpong shidak bentshüsi atema asenoki nüburtem ajungshitsüla," ta PM Modi-i ashi. India nung Covid-19 tashidak menar million 30.91 dak tema jungogo aser United states sülen tanabuba jenjang nung lir. Mongolbarnü nisung 32,906 dak Covid-18 tashidak potetogo aser nisung 2020 süogo. Asürtem rongnung Madhya Pradesh nung taoba mapa asürtem mezüngoksemi aliba densema lir. India nung tang tashi nung iba tashidak agi nisung 410,784 süogo. PM Modi-i tashidak tapu tasenba atema meita atatsü aser nüburtem nem takaratiba nung vaccine agütsüsi ayongzü.

### TMC lenirtemi EC ketdangsürtem den ajuruteptsü

**Kolkata, Chiteni/July 13 (Agencies):** Trinamool Congress lenir telok kati July 15 nü Delhi nung Election Commission (EC) ketdangsürtem ajurua bypolls takaratiba nung agütsü mepeshitsü. West Bengal nung assembly menden trok tazüng lir aser iba atema election agütsü nüngdaka lir. Tawa BJP lenir Nisith Pramanik aser Jagannath Sarkar nati MLA mapa toktsür MP mapa belenzükba sülen Dinhatra aser Santipur assembly menden tazüng kümogo. Kasa mapang nung Murshidabad kübok Samserganj aser Jangipur menden nungi tokteptsüpur ajungbena süadokba ajanga

election magitet. North 24-Parganas district kübok Khardah mendena TMC candidate Kajal Sinha covid tashidak menar süatokba ajanga tazüng kümogo. Iba menden ya pai koka liasü. Trinamool MP Saugata Roy-i, "state nung election shilem ti küma lemsar agiba ajanga Bengal kangshiba (Covid-19 ateshia) asenok ajaki meteta lir. Tangbo EC-i jenjang tapet agia bypolls takaratiba nung agütsü imlaa atar," ta ashi. "Onoki EC ketdangsürtem den ajurutepta bypolls takaratiba nung agütsü mepeshitsü. Onoki hopta ka nübu ayimtsü atema mepeshitsü. (Maneni tapak 9 nung...)



Surat nung COVID-19 tenokdangba agütsür aliba salaja kaketshir shilem 50 class nung adentsü melaba sülen coaching centre ka nung tesayur kati lesson sayuba noksa nung angur.

### Serum-i Russia indang Sputnik V vaccine yanglutsü: RDIF CEO

**New Delhi, Chiteni/July 13 (Agencies):** Pune nung amendaker aliba Serum Institute of India (SII)-i, September ita nungi tenzüka anti-coronavirus vaccine Sputnik V yanglutsü, ta Russian Direct Investment Fund (RDIF) CEO Kirill Dmitriev-i ashi. Paisa, India nung iba vaccine yanglutsü atema tanga manufactures-a kar renema lir, ta ashi. AFP sangdong ka ajanga ashiba agi, Alima nung vaccine yangluba company tulutiba (volume nung) SII den küm nung vaccine dose million 300 yanglutsü atema tenangzüktepba ka yangluogo. "India nung küm shia vaccine dose million 300 dak tema

yanglutsü atema sentong lir aser 2021 küm September ita mezüngbuba batch yangluzütsü imlar," ta RDIF-i ashiba den Russia indang Gamaleya Centre nungi SII-i cell aser vector samples agizükogo, ta ashi. Drug Controller General of India (DCGI)-i temelaba agütsüba sülen vaccine yangluo tenzükögo, ta Russian sovereign wealth fund-i ashi. Dmitriev-i iba telongjem ya linük aser producers tem tsüngda tongtibang tesendaktep tatishitsüka ta ashi. Vaccine yanglurtemisa, Serum-i Covishield nungja agütsür AstraZeneca indang anti-Covid-19 vaccine yangluo lemshiba

den meyojteper vaccine ka yanglutsü asatepdar aser July tatemi parnoki ngutetbatem sangdongtsü imlar. Dmitriev-isa, SII-i yangluba Sputnik V vaccine ya tanga linükia belenshüsi, ta ashi. Taoba mapang Gamaleya institute-i, Alpha aser Delta strains densema coronavirus tashidak tapu tasen ajak atema iba vaccine ya tapet ta shiogo. Kasa mapang nung Hyderabad nung amendaker aliba Dr Reddy indang Laboratories-i mezüng iba vaccine ya India nung yangluo lemshitsü atema tenangzüktepba ka yangluo aser linük nung yimti aser jila 50 nung lemshia liasü.

### Rahul Gandhi-i Amarinder indang adviser Kishor den ajuruteptep

**New Delhi, Chiteni/July 13 (Agencies):** Poll strategist Prashant Kishor-i Mongolbarnü Taoba Congress tir Rahul Gandhi aser Priyanka na den ajuruteptepogo. Iba senden ya taruba küm tetenzüklen Punjab election atema party asoshi kanga tongtibang asütsü ta bilemer. Punjab chief minister Amarinder Singh den ajuruteptepba sülen anogo ishika lir Prashant Kishor-i Congress lenirtem den ajuruteptepogo. Amarinder Singh tang Navjot Singh Sidhu den yimden yimsüsüba tsütsü mangatettep tulu adoker lir. Amarinder, shiba tanabuba term atema CM mapa abentsü asoshi renemdar, pai pa indang principal adviser asütsü atema Prashant Kishor shimogo. Sidhu-i pa Punjab chief minister den meputepba indang jembia arudar aser pa tajangzü.

merangdangdar. Kasa mapang nung Amarinder-i iba ken o bentettsü nükjidong nung interim Congress tir Sonia Gandhi den ajuruteptepogo. Senden amenba sülen Amarinder-i, Sonia-i kechi telemteba agidir iba sülen pa anidaksü ta shiogo, saka Sidhu den mangatettep aliba indang kecha mejembi. Taruba küm tetenzüklen election magi tsüngda state unit nung mangatettep aliba bentettsü atema Congress-i merangdanga arudar. Prashant Kishor-i taoba ita ishika tsüngda opposition lenir aika den ajurutepta arudar. Pai Nationalist Congress Party tekolakba Sharad Pawar den tawa ajuruteptepba ajanga opposition party tem longjemtsü akok ta aikati bilemer. Ajisüaka Prashant Kishor-i, opposition coalition koba südir süaka idakji Congress adentsüla ta shiogo. Punjab nung Congress party yongtsü nung mangatettep adoker aliba teyalong nung Navjot Singh Sidhu-i Twitter ajanga opposition Aam Aadmi Party-i pa nükla aser Punjab atema pai inyakba jangjaa lir ta ashiba ajanga ajak mangmangdaksü.

Sidhu-i tawa Rahul aser Priyanka na den ajuruteptepogo, shirnoki Punjab nung mangatettep adoker aliba longjemdaksütsü atema

Sidhu-isa, pai ken o balala nung ola adokba atema AAP lenirtemi pa tenüng asangba indang video tejentem dena lemsatepa liasü.



Amritsar nung petrol aser diesel jenjang ajungketba anema cycle rally ka ayongzüka agiba mapang District Congress Committee Amritsar (Urban) tir Jatinder Sonia-i shilem agiba noksa nung angur.



South Africa anüdoklen KwaZulu-Natal province kübok Durban yimti nung nüburtemi tashiyim amshia store ka kakkoker yangji aliba osettem auyaa bener aoba noksa nung angur. Court mezügmeshiba mechi South Africa indang taoba Tir Jacob Zuma tepuokdak ayuba sülen linük nung tensa mejungi akumer, kong nisung trok tashi takum laluogo.

### Iraq COVID ward nung mi adok, nisung 52 asü

**Nasiriyah, Chiteni/July 13 (Agencies):** Hombarnü Iraq nung mozüki ka indang coronavirus isolation ward nung mi sashia jangrua nisung 52 asü aser 22 yiru, ta health ketdangsürtemi ashi.

Iraq south tsütsü Nasiriyah yimti nung aliba Al-Hussein hospital nung Hombarnü menur mi ya adok aser yangji aliba civil defence forces temi azüokteta liasü.

Oxygen tank apokba nungi mi ya jangru, ta health directorate nungi medical osang ka ajanga ashi.

COVID isolation ward nung mi kaolokba sülen tang tashinung nisung tasü mang 52 nguteta lir aser ano nisung 22 yirua lir, ta yangji aliba health authority indang odongtar Haydar al-Zamili-i Mongulbarnepe ashi.

Asürtem rongnung health worker ana densema lir, ta ashir.

"Asürtem ya mi agi rongsetba lir aser ano maneni bushiba mapang lir. Iba ki telung nung ano nisung kar nembanga alitsü südi, ta bilemer. Iba ward nungya yipten 70 liasü," ta pai ashi.

Iraq nung ita asem tsüngta mozü kidang iba ama lendong ya tan agi tanabuba alitsü.

Mozüki kimalen lanur telok ka longkak aita liasü aser parnoki "Political party temi asenok arong," ta ayimten.

Iba mi lendong ya ajanga ketdangsürtem mapang nungi anentsü asoshi social media nung ola adoker.

Ketdangsürtemi Dhi Qar governorate nung state of emergency benoka lir, kong Nasiriyah ya yimtiba lir, aser leave nung aliba doctor tem dang yirur alirtem yaritsü totuyuba agütsü.

Iba mi adokba kuli metettsü atema Iraqi Prime Minister

Mustafa al-Kadhemi-i minister aser security head tem den ajungben senden ka menogo, ta pa indang office ajanga Mongulbarnü Twitter nung ashi.

Dhi Qar indang health ketdangsür aser mozüki tekolakba police temi pua asüngdangyaogo, ta tir indang office ajanga ashi. Paise southern governorate-i emergency medical aid tem yokogo.

"Al-Hussein Hospital nung lendong atalokba ya ajanga Iraq nüburttem takum kumzüka meyutetba kuli tejangja sayur, aser iba amala timtem tatem kumdaktsütsü mapang tongogo," ta Iraq indang Parliament Speaker, Mohamed al-Halbousi-i Twitter nung zülua liasü.

Mozüki anasa khen atema yanglua aliba tesem nung mi ya kaolok, ta Iraq interior ministry ajanga ashi Facebook nung ashi saka iba lendong adokdaksüba kulibo mashi.

Online nung video tem prokshiba nunga al Hussein mozüki nungi anüngleni mokozü temelem adoka aliba nguogo.

April ita Baghdad nung COVID-19 hospital ka nung mi adoka nisung 82 asü aser 110 yirua liasü. Iba lendong ya oxygen cylinder tem junga rizünga mayuba nungi adokba alitsü.

April ita lendong nung asürtem ya timba respirator nung liasü aser parnok ya rongset mesüra tango mesashiteti asü, kong kinungertemi intensive care unit nung shirangertem semdangba mapang liasü.

April ita kitsük-kirong lendong ya ajanga nüburttem ain adoka iba mapang health minister inyaka alisang Hassan al-Tamimi mapang nungi anen.

Totzü nung rongsenketzüng

metaloka aliba linük, Iraq ya küm aika raraba aser telungpur telok balalai timtem agütsüba nungi tang ang shia aruba mapang ka lir, kong nisung aika maka-mait tia nung lir. Iba linük nung coronavirus cases million 1.4 dak tema lir aser nisung 17,000 dak tema iba tashidak agi süogo.

Linük nung health infrastructure timba tepetzük jenjang nung lir, aser ochimashi mapang bulua inyakba mechi public services nung sen indoktsü kanga tasak lir.

March ita nungi tenzüka Iraq nung coronavirus mozü amshia arudang health ketdangsürtemi linük nütsüng yongsük million 40 shi aliba nungi shilem ka shi nem ang doses ajak abensa agütsür lir.

Hombarnep Baghdad nung aliba health ministry indang headquarters nung kitsük-kirong lendong tilaka adoka liasü, saka kanga kera remseptet aser yangji asü-amaba meliasü.

### Sher Bahadur Deuba-i Nepal PM mapa agizükogo

**Kathmandu, Chiteni/July 13 (Agencies):** Nepali Congress tir Sher Bahadur Deuba-i, Mongolbarnü linük Ato Kilonser mapa pongubenbuba belenzükogo, ta media sangdong ka ajanga metetdaksü. Constitution Article 76(5) dak ajemdaker tir Bidya Devi Bhandari-i pa shima liasü, ta Himalayan Times-i metetdaksü.

Tang agi pongubenbuba arishi küm 74 tain Deuba Nepal Ato Kilonser kümogo. Hombarnü Suprem Court-i tetuyuba agütsüba sülen K P Sharma Oli melena pa shimogo.

Tir office ajanga PM asütsü shimba Deuba nem metetdaksüogo, ta kasa sangdong ajanga metetdaksü. Tang tashi nung pa tenangzüktepba sentong agütsüba indang osang kecha agüja mali saka sentongbo yangludat, ta metetdaksü.

Taoba mapang Deuba-i Nepal Ato Kilonser mapa pezüben benogo. Pai June 2017-February 2018, June 2004-February 2005, July 2001-

October 2002 aser September 1995-March 1997 tsüngda PM mapa inyaka liasü. Constitution dak ajemdaker Ato Kilonser mapa abentsü asoshi shimba sülen anogo 30 tsüngda Deuba-i House nung vote of confidence angütsü nüngdaker.

Prime Minister Oli-i May 21 nü House of Representatives loksatsü telemtetba agiba magi kumdaktsür Suprem Court-i Hombarnü Ato Kilonser mapa asoshi Deuba shimtsü tetuyuba agütsü. Chief Justice Cholendra Shumsher Rana-i aniba Constitutional Bench-i ashiba agi, Oli-i Ato Kilonser mapa abentsü pa tetemsü lir ta ashiba ya temzüng ozüng alema lir.

Oli-i December 20 nü House loksatsüba sülen Suprem Court-i February 23 nü tanaben amenokshitsü. Bench-isa July 18 nü nikongtsütsü 5:00 ako tashi nung House senden ka ayongzüka amentsü tetuyuba agütsüogo. Maneni Benchi-i, Deuba-i sorkar tasen ka tentettsü atema akhangba tir Bhandari-i magizükba ya temzüng ozüng alema lir, ta ashi.

### Myanmar mitkari Aang San Suu Kyi anema ken o tasen benok

**Yangon, Chiteni/July 13 (Agencies):** Myanmar nung mitkari Aang San Suu Kyi anema ochi mashi ken o talila kar benokogo, ta la okatsüri Mongolbarnü ashi. Iba taitstüba ajanga la tepuokdak küm ter dak tema ayutsü akok.

February ita mitkari sorkar atsüngtokba sülen Myanmar nung mepetmesü tulu adoker lir aser sepaitemi nüburttem tashiyim agi azüoktsü merangba mapang nisung 890 tepsetogo, ta local monitoring group kati metetdaksü.

Arishi küm 76 tain Suu Kyi shiba tang lar kidang shibanga/pua yua lir, lai sorkar anema

nokdaksü atema nüburttem ajungmesoba, ozüng alema walkie-talkies bendanglen nungi bener arua amshiba aser taoba küm election mapang coronavirus dak sendakba nung tenokdangba agütsür aliba anema inyaksangshiba atema aija lir.

La ano ken o pezü nung aitsüogo, ta la okatsür Khin Maung Zaw-i Mongolbarnü osangbenertem dang ashi. Paise, Suu Kyi-i ozüng alema USD 600,000 agizük aser hon seret 11 shi agizük ta shia aitsür aliba nung ken o tasen bendenloktsü, ta ashi.

(Maneni tapak 9 nung...)



Sri Lanka nung aliba Bibila kübok yimtsüng ka nung aliba tanurtem internet signal bushia arem min ka nung oa süngdong kongsang ka nung mener online lesson angazükba noksa nung angur. Sri Lanka nung yimtsüngtem nung alirtem online school nung adentsü ya temela masü, kechiaser tanuremi internet signal bushia arem min aser tenem kolak bushia jajatsüsa akümer, kong keyi aser shiti temi mapang shia semdang.



## Bhanu Bhakta sor küm 207 ajungba anogomung mungogo



Kohima, Chiteni/July 13, 2021: Aadi Kabi Bhanu Bhakta Acharya sor küm 207 ajungba anogomung sentong agiba mapang, GPPK Kohima president Santu Thapa den Kohima indang Gorkha lennir aser ketdangpur tem külemi tangokba noksa ka yangi angur.

**Kohima, Chiteni/July 13, 2021 (TYO):** Mongolbarnü, Kohima nung Gorkha teloki Aadi Kabi Bhanu Bhakta Acharya sor küm 207 ajungba anogomung mungogo. Gorkha Sahitya Kala Sanstha Kohima (GSKSK) kübok GPPK Hall, Chandmari nung COVID-19 tetuyuba nung anidaka Gorkha Public Panchayat ketdangpur, tentet balala den külemi online google nung shilem agirtem densema iba sentong ayongzüka liasü, ta sangdong ka ajanga metetdaksü.

Iba sentong nung, GPPK President, Santu Thapa-i, Bhanu Bhakta Acharya indang maparen balala yimdingi arua telok den jembia aser Sangro zülur ka ama, Bhanu maparen rongnung pai Ramayana otsü Nepal oshi nung meyipzüka ya ajak dang tulutiba ama züngshir, ta Thapa-i ashi.

Thapa-i ashiba agi, lokti ajungkettsütsü nükla tulu yur Acharya-i bendanga agütsür inyakogo.

Acharya asoba anogomung

sentong nung, GPPK president-isa, tawa-tanü alima tesem ajunga nung coronavirus wara ajanga meimchir timtemba indang nung jembia aser sentong nung adener ajak dang Covid temzüng nung tashi anga anidaksü asoshi ajungshiba den külemi Covid vaccine agitsü asoshi pai telok dang mepishia liasü.

Lokti tsünga COVID-19 wara tasembuba nungi kümzüka alitsü asoshi akok tashi nüburttem dang tekümdangtsü osang sangoktsütsü; aser iba den külemi lokti kümzüka ayutsü asoshi kija shia khuret abentsü asoshi pai metetdaksü.

Maneni, iba sentong nung, GSKSK vice president, Ganga Thapa menden liasü. Bhanu Bhakta Acharya indang noksa nung narozük inokja aser temo milen tsüklokja iba sentong tenzü. Kasa sentong nung Bala Khawash-i, Acharya taküm nung inyakba maparen tem telok den lemsatop aser GSKSK general secretary Susila Limbu-i tepela anküp o jembia, ta sangdong ka ajanga metetdaksü.

## NLFB tanishir Jayphrush khaset

**Guwahati, July 13, 2021 (Agencies):** Sepaitemi mapang talangka nungi bushia aruba National Liberation Front of Bodoland (NLFB) züngsem ka Dimachang tesem nung khasetogo.

Mongulbarnep Udalguri district nung iba sepaitem den khatepdang telungpurji khaset. Osang tejangja ka

angazükba sülen Udalguri Police-i Udalguri nung NLFB district commander Jayphrush (N. Jwngkhwil) khaset.

Iba tesem nungi pistol ka den injangtem ngutetogo.

Police aser security forces-i National Liberation Front of Bodoland (NLFB) indang district commander senzusenbongba kanga junga

mita aru.

Pa ya M. Bathaden yariteper tajung ka liasü aser pa ya taoba mapang NDFB(S) den sendaktepa liasü.

NDFB telok ajak den 3 buba Bodo peace pact sign asüba mapang Batha ya temai adok, saka National Liberation Front of Bodoland (NLFB) len anitsü atema pa ano telungi iadok.

## TMC lenirtemi EC ketdangsürtem... (Tapak 7 nungi...)

Chief minister Mamata Banerjee-i, bypolls tembangba sülen municipal election agitsü atema rangloker inyaksü ta shiatokogo," ta Roy-i ashi.

May 21, Bhawanipur constituency nungi TMC MLA Sovandeb Chattopadhyay-i mapa toktsüogo, ajita asünungdang Banerjee iba menden nungi tokteptetsü.

Indian Constitution kübok Banerjee, shiba Nandigram menden nung tamakok angu, lai chief minister ama state achaayanga atatetsü, saka la mapa maneni abentsü atema ita trok tsünga election agia la shimtsüla. Iba dak sendakba nung assembly menden trok atema bypolls ya November 5 nü tashi nungbo agitsüla.

BJP otongdar, Shamik Bhattacharya-i, "shingaiya bypoll anema menokdaker saka TMC-i kechiba taoba küm ana tashi municipality elections ayongzüka magir. Parnoki bypoll mapang shidak nung aginer aser onoki West Bengal nung municipal election agitsü atema tangsa tang sangdongdaksüner. Temzüng ozüng tashi meite akümba ajanga West Bengal nung tensa mejungi lir. Election tembangba sülen mepetmesü aika adoker saka police-i kecha minyaker," ta ashi.

TMC-i, by election takaratiba nung agidaksüner, kechiyong COVID-19 wave tasembuba dak ajemdaker EC-i election thinentsütsü akok.

Ita trok tembangba tashi nung (EC-i election thinentsüsa) Banerjee meshime lira la Vidhan Parishad mesera Legislative Council ajanga aitsü akok.

West Bengal Assembly-i tawa lenir tejentem backdoor ajanga anioksü atema Legislative Council asoshi bangzü ka agizükogo.

Vidhan Parishad atema State Legislative Assembly-i majority mesera two-thirds dak tajemba agi bangzüng ka agizükra Indian Constitution Article 169 kübok Parliament-i iba bangzüng agizükshitsü nungdaker. Ajisüaka West Bengal nung TMC-i menden 213 kokteter lir asünung iba bangzüng agizüka ayutsü atema kecha tetsükdaksü madoktsü.

## Myanmar mitkari Aang San Suu Kyi... (Tapak 8 nungi...)

La indang legal team-i tang tashi "first information reports aser tanga kuli kakettem," mangu ta pai ashiba den ken o tem ya Mandalay yimti nung July 22 nü nungi tenzüka okadak kati angadangtsü ta ashi.

Mongolbarnü Suu Kyi-i covid dak sendakba nung

tetuyuba agütsür aliba nung aibelen ta shia lai aitsüba ken o angadangtsü atema lateter liasü, saka prosecution witness ka danga maruba ajanga ken o mangadang, ta Khin Maung Zaw-i ashi.

Hombarnü prosecution witness ka coronavirus

tashidak agi atongba ajanga okadak kuli magütsütetsa aküm.

Myanmar nung coronavirus tashidak menar aika küma odar aser State Administration Council-i Hombarnü nisung 5,000 tema dak tashidak potetba metetdaksüogo.

## MENUNGRA BILEMTETER



Akala Longkumer

Temeim Oja,

Tanü anogo na iba lima nungi pilar küm ana abensar, nü sayubentsü aser temeim mapatem teti onoki bilemteter aser iba temeim nung kinungertem talubosa lir.

Na teti tatem makaba anisüngzük lima nung lir ta amanger aser iba jagi onok mulong süngzük.

*Temeim kinungbo, jala jabasotem, semchirtem aser kinungertem.*

## MULUNGNEN O



ASO :  
15.05.1939

ASÜ :  
04.07.2021

Tsürabur ojala asür Likokla la akümüli tembangba mapang asen tendak tetsübuttsü tesashi wara liaka, ozü den asüku lemsateptsü shirnokisa nübo, rongsen, shisatsü aser sarasadem agi yaria aruogo, nenok ajak dang kanga pelaba lemsateper. Tsüngremi nenok temeim mapa tajung asoshi moshia moajangma.

*~ Temeim Chirnur, Anükapang, Semchirtem aser Kinungertem.*

### 2021 SCHOOL ADMISSION OPEN NOW

FOR GRADE XI (CBSE)

- COMMERCE
- SCIENCE
- ARTS

**“YOUR KIDS OUR PRIDE”**

**ENROL NOW**

**WHEN YOUR CHILD'S FOUNDATION IS STRONG, THEY ARE PREPARED TO FACE THE WORLD**

**“Proven to make a difference for every child that steps in”**

**JOIN US ON SOCIAL MEDIA**

[livingstone.nagaland@gmail.com](mailto:livingstone.nagaland@gmail.com)  
[livingstonenagaland.com](http://livingstonenagaland.com)  
[livingstonenagaland](https://www.facebook.com/livingstonenagaland)

**CONNECT WITH US**

03862 - 244203 / 244302  
 +91 70 05 99 60 92  
 +91 70 05 99 60 93

- Forms available! At School Office 9:00 am to 2:00 pm.
- Classes resumes from 2nd August'21 either offline/online mode.
- Due to pandemic crises, the school has further decided to waive off 20% of School fees for two months to those in need in addition to the existing concessions given in aid to deprived students.
- 100% concession in both Hostel & School fees to Top 5 Rankers from all recognised boards across India and abroad.
- 50% Concession in both hostel & school fees to other Toppers.
- 25% Concession in Hostel & School fees granted to students with excellent flair in Sports, Art, Music & other skills.
- 50% Concession in Admission & School fees for students who lost their Parents/Guardians to COVID-19.

## ALI AYOKTSÜ LIR

Hozukhe village (Foot Hill Road nungi minute 3 shi pilar) Sq. ft nung Rs. 15/-

Contact no- 8974869756

## AR-i Zubza nung Volleyball asaya ayongzük

**Dimapur, Chiteni/July 13, 2021 (TYO):** HQ IGAR (N) kübok Ghaspani Battalion - Assam Rifles-i Hombarnü (12.07.2021) Zubza Town, Kohima District nung Lanur team balala atema Friendly Volleyball Match tem ayongzükja liasü, ta sangdong ka ajanga metetdaksü.

Iba Friendly Volleyball Match nung, Zubza tesem nungi lanur 40 agi shilem agiogo, kong 'Zubza Youth Team vs Assam Rifles Team' aser 'Zubza Girls Team 1 vs Zubza Girls Team 2' tsungda asaya liasü.

Iba asayamung nung Angami Youth, Kohima

District, Vice President, Mr Neubu Sechu aruagi denogo. Lanurtem tsungda saispung tsütsü renlokda tsütsü aser ajungkettsütsü nükjiding yur iba friendly volleyball ayongzükba atema, lanurtemi Assam Rifles dang pelaba metetdaksü, ta kasa sangdong nung shia lir.

## Yashpal Sharma alima nungi pilaogo



**New Delhi, Chiteni/July 13, 2021 (Agencies):** Taoba mapang India batsman Yashpal Sharma, shibai Kapil Dev-i aniba team den külemi asaya 1983 World Cup takok angu, pa temulungjang agi mapa meinyaki akümba sülen, Mongolbarnü süogo. Sharma arishi küm 66 liasü aser pai kinungtsü, jala ana den jabaso ka toktsür süogo.

Tanep yimdong nung jaja senzür meyipa aruba sülen, Sharma pa kidang laoadok, ta sangdong ajanga metetdaksü.

Sharma kanga dang tasütait asayar ka liasü aser Old Trafford nung England team den World Cup semifinal asayaba mapang team atema pai half century yanglutet.

Iba semifinal asaya nung Yashpal Sharma-i half century yangluba den külemi, run timtiba yanglur India nung rongnung

pa liasü. Asayamung ayonger team den semifinal asayaba mapang, Sharma-i run 61 yanglu aser tanabuba innings nung pai Mohinder Amarnath den külemi India atema run 92 tashi bendenloksü.

Sharma-i India national team tenung nungi ODIs 37 aser Tests 42 nung shilem agi aser 1979 nungi 1983 küm tashi India team atema pai middle-order batsman ka ama shilem agia liasü. Küm ishika atema Sharma-i national selector ama inyak aser 2008 küm iba panel nung pa tanaben shima liasü.

1987 küm Sharma-i ODI nung ajemoka Pakistan den mezüng asaya aser iba format nung pai average 28.48 nung run 883 yangluogo. Ranji asayamung nunga mapang balala nung pai Haryana aser Railways densema team asem nungi shilem agiogo. Sharma-i asaya 160 (Ranji) nung century 21 densema run 8, 933 yanglua liasü. Item asaya rongnung pai run 201\* tashi yanglua lir, koba pa indang century rongnung timtiba asütsü.

"Yashpal Sharma iba akümlü nungi pila aoba osang mamangteter. Küna külemi sensaksema aser shisatsü lemsatepba bilemteter. Punjab nungi küna külemi cricket asaya tenzük aser pa den World Cup

## Mahmudullah-i Test asaya nungi anentsü telemtetba agi



**Dhaka, Chiteni/July 13 (Agencies):** Bangladesh nung all-rounder tejen Mahmudullah-i, Test cricket asaya nungi anentsü atema ajungbena telemtetba agiogo. Zimbabwe den Harare nung tang asayaa aliba Test nung run 150 yangluba sülen anogo ka lir pai iba telemtetba agia liasü.

Cricbuzz sangdong ka ajanga ashiba agi, Mahmudullah-i külem asayatem dang pa joko Test ojang dang asayaner ta shiogo

aser iba ajanga team management kanga aoksadaksüogo.

"Hau pai (Mahmudullah) Test ojang dang asayanüba indang metetdaksüogo. Ajisüaka pai officially osang kecha magütsü anungji khen mulungtet dang jembizüka yokba dang asü kechiar ataa lidi," ta Bangladesh Cricket Board züngsem kati ashi.

Mahmudullah-i Test 49 asayaogo aser run 2764 yanglua lir. Pa mezüngbuba 2009 küm

West Indies den asaya liasü.

Bangladesh team nungi mezüngbuba asayaba mapang pai run bo meyanglutet saka iba asaya nung pai wicket ti agia liasü aser iba ajanga Bangladesh team nem bendanglen mezüngbuba takok agütsü.

Iba sülen Test nung pai kanga junga asaya tenzük aser asaya pongu atonga run 50 dak tema yanglu, kong New Zealand den Hamilton nung asayaba mapang number ti buba nung aiter mezüngbuba century yangluba densema lir.

Mahmudullah ya tang national T20 team captain lir aser 2015 World Cup nung Bangladesh nung batsman tem rongnungi pai tajungtiba asaya. England den asayaba mapang pai century ka yanglua England asayamung nungi tugudaksü aser iba sülen ano pai New Zealand den asaya nunga out mesüi run 128 yanglu, saka tia maka parnoki asaya makok.

## BengaluruFC-i defender Sarthak Golui alizükogo



**Chiteni/July 13, 2021 (Agencies):** Bengaluru FC-i India nung asayar Sarthak Golui den küm ana atema tenangzüktepba yangluogo, ta club sangdong ka ajanga Hombarnü metetdaksü.

Arishi küm 23 tain asayar densema Bengaluru FC-i taruba season atema asayar pezü alizükogo. Parnoki Yrondü Musavu-King, Alan Costa, aser Rohit Kumar nung alizükogo aser taruba AFC Cup playoff stage nung Eagles FC den masaya tsungda parnok club nung adentsü.

Golui ya AIFF Elite Academy nungi anitetba asayar ka lir aser pa I-League aser Indian Super League nung club balala nungi asayaogo.

Bengaluru-i maru tsungda pa FC Pune City, Mumbai City FC aser SC East Bengal nungi asaya 49 nung asayaogo.

"Takok tajung nguyonga aoba club nung adentsüi khuret lir aser club aser fan temi imlaba ama ni asayatetsü imlar," ta Sarthak-i ashi.

"Iba jenjang agiba ya kü atema challenge tulu ka aser ni anogoshia akokba tashi club nem tajungtiba agütsütsü. Management aser coach-i kü dak tamang kaa ni club-i anir aruogo aser ni meyipa agütsüner.

"Iba ajanga Sunil aser Gurpreet nung amala asayar tejentem nungi angazüktsü atema maangka angutsü aser team nung külem asayatem den ajuruteptsü yongyaa atar," ta Golui-i ashi.

Golui, taoba mapang U-16 aser U-19 jenjang nung India tenung nungi asayaogo aser 2018 SAFF Championship nung Sri Lanka den asayaba mapang senior national team nungi mezüngbuba asayaa liasü.

## West Indies-i Australia kokogo

**St Lucia, Chiteni/July 13, 2021 (Agencies):** Australia aser West Indies na tsungda St Lucia nung Twenty20 international T20I tasembuba asaya nung, Chris Gayle-i ball 38 nung run 67 yanglua par team-i wicket trok agi England kokogo. Asaya pungo T20I series nungi Indies team-i asaya asem tashi atonga takok angur asütsü.

Iba asaya akoktsü atema West Indies-i run 142 yanglutsüsa aküm, kong Gayle-i team pur nungita asayaogo. Pai 6' tenet densema run 67 tashi yanglutet.

2016 T20 asayar külen nungi arishi küm 41 tain Gayle-i iba format nung mezüng T20 half-century yanglua liasü. Kasa mapang, captain Nicholas Pooran-i run 32 bendenloksü.

"Mapang talangka lir iba format nung asayatsü maangka angu. Iba den külemi series ka takok anguba asoshi pelar. Team tajung (Australia) ka den asaya iba series takok

angutsütsü shilem tulu agiba atema captain Pooran dang pelaba shisemer," ta Gayle-i ashi.

Australia-i toss koka mezüng batting asütsü shim. Obed McCoy aser Fabian Allen nati Opener Matthew Wade (23) aser Mitchell Marsh (9) out mesütsüadang, Australia team pur melungi asaya tenzük. Over 10 nung Australia team run 72 yanglur lia wicket 2 out süadok.

Iba sülen, over 12buba nung, Leg-spinner Hayden Walsh-i Alex Carey (13) aser captain Aaron Finch (30) naprongla out süja, Australia pur run 80 yanglur wicket 4 tashi tukadoker liasü, saka Henriques aser Turner nati meranga asaya.

Over tatemlen, Dwayne Bravo bowling nung Henriques-i junga mezükshiba ball ka ali matongdang mid-wicket tsütsü Allen-i ajepzüka pa (Henriques) out mesütsüadang, Turner aser Henriques nati Australia atema run 59 bendenloksü.

## BILEMDANGANG

"Tangar dang aiben ashiba dang nungibo nai ka inyakbaji taoba."